

Započela kampanja “Stop nasilju u porodici”

17.07.2017 12:39



Danas (17.07.2017.godine) je u Tuzli započela petodnevna kampanja pod nazivom “Stop nasilju u porodici”, koju organizuje MUP TK-a zajedno sa ICITAP-om (Međunarodni program pomoći u kriminalističkoj obuci Ministarstva pravde SAD-a za BiH) i INL-om (Uredom Vlade SAD-a za saradnju agencija za provođenje zakona u borbi protiv narkotika).

Ovom prilikom, organizovan je info pult na kojem je građanima dijeljen tematski promotivni materijal i na kojem su mogli ispuniti anonimni upitnik o mišljenjima i iskustvima vezano za predmetnu problematiku, te direktno postaviti pitanja u vezi nasilja u porodici i dobiti informacije za prevenciju i suzbijanje nasilja u porodici, uz prisustvo predstavnika organizatora kampanje i Tužilaštva TK-a.

“Kampanja je prilika da se građanstvo upozna sa navedenom problematikom kroz direktni kontakt sa službenicima policije MUP TK-a zaduženim za rad sa zajednicom i onima koji rade na slučajevima nasilja u porodici. Na ovaj način se budi svijest kod građana, jer je to jedini način da mogu reći da zajednica postoji tu za njih i da mogu takva djela da prijave. Naravno da poslije svake kampanje postoje očekivanja da će se povećati broj građana koji će prijaviti nasilje u porodici. Mi bez obzira na kampanje, godišnje imamo oko 600 do 700 takvih prijava, ali se ne realizuju sve prijave Izvještajem jer žrtva koristi blagodet zakona u smislu odustajanja od prijave” - istakla je mr.sci. Alma Kovačević - istražitelj u Odjeljenju za seksualne delikte, maloljetničku delinkvenciju i nasilje u porodici Sektora kriminalističke policije MUP TK-a.

“Ovo je dobra prilika da zajedno sa pripadnicima MUP TK-a uzmemo učešće i damo doprinos projektu ICITAP-a, u cilju jačanja svijesti građana na potrebi prijavljivanja krivičnih djela nasilja u porodici, kao i jačanju svijesti na potrebi istrajavanja tokom krivičnog progona prijavitelja odnosno oštećenih, s obzirom da sudska praksa i statistički podaci pokazuju da veliki broj krivičnih djela nasilja u porodici završava ili negativnim tužilačkim odlukama ili oslobađajućim presudama zbog odustajanja oštećenih od krivičnog progona, odnosno prava da koriste blagodet i odbiju svjedočenje kao privilegovani svjedoci. Mislimo da je rješenje isključivo na jačanju svijesti kod oštećenih, odnosno prijavitelja da istraju do samog kraja postupka, do donošenja prvostepene presude upravo u cilju što efikasnijeg procesuiranja krivičnih djela nasilja u porodici koja imaju tendenciju rasta u posljednje vrijeme” - rekao je Vedran Alidžanović, tužilac Kantonalnog tužilaštva Tuzlanskog kantona.

Kampanja “Stop nasilju u porodici” će trajati ukupno pet dana i provodi se na području Tuzlanskog kantona u vremenskom periodu od 17. do 21. jula 2017.godine, i to: u Tuzli (17. i 18.07.), Živinicama (19.07.), Srebreniku (20.07.) i Gradačcu (21.07.).

Preuzeto sa web stranice **Ministarstva unutrašnjih poslova Tuzlanskog kantona** - <http://muptk.ba>